


СОЛБИЦЛЫН НЭГДСЭН ТОГТОЛЦОО

Монгол Улсад 1935 оноос геодезийн хэмжилт, зураглалд Пулково1942 солбицлын тогтолцоо, Крассовскийн референц эллипсоид, Балтийн тэнгисийн өндрийн тогтолцоо, том, дунд масштабын байр зүйн зураглалд “Гаусс Крюгер”-ын тусгагийг дунд масштабын байр зүйн зураг зохиоход хэрэглэж байсан.

GPS-ийн технологийг Монгол улсад 1997 оноос ашиглаж эхэлсэнтэй холбогдуулан 2002 оноос төв суурин газрын том масштабын байр зүйн болон кадастрын зураглал, газар тариалангийн бүсийн дунд масштабын кадастрын зураглал, дунд масштабын байр зүйн зургийг тоон хэлбэрт шилжүүлэхэд GPS-ийн солбицлын тогтолцоог ашиглах болсон.

Монгол Улсын Засгийн газрын 2009 оны 25-р тогтоолоор “WGS-84” солбицлын тогтолцоо, Балтийн тэнгисийн өндрийн тогтолцоо, том, дунд масштабын газрын зураглалд дэлхийн хөндлөн меркаторын “UTM” тусгагийг хэрэглэхээр болсон. ГХГЗЗГ-ын даргын 2014 оны 112-р тушаалаар ITRF2008 тогтолцоог геодезийн хэмжилт, зураглалд ашиглахаар шийдвэрлэсэн /Зураг 1-д үзүүлэв/.



Зураг 1. Хүчингүй болсон Засгийн газрын тогтоол “Монгол Улсын геодезийн солбицол, өндөр тусгагийн нэгдсэн тогтолцоог батлах тухай”

Засгийн газрын 2022 оны 267 дугаар тогтоолоор геодезийн солбицлын “ITRF2020” тогтолцоо, өндрийн сүлжээнд Балтийн тэнгисийн тогтолцоог, газрын зураглалд дэлхийн хөндлөн меркаторын “UTM” тусгагийг тус тус хэрэглэж байхаар шинэчлэн баталлаа /Зураг 2-д үзүүлэв/.



МОНГОЛ УЛСЫН ЗАСГИЙН ГАЗРЫН ТОГТООЛ

2022 оны 7 дугаар сарын 5-ны өдөр

Дугаар 267

Улаанбаатар хот

ГЕОДЕЗИЙН СОЛБИЦОЛ, ӨНДӨР, ТУСГАГИЙН НЭГДСЭН ТОГТОЛЦООГ ШИНЭЧЛЭН

БАТЛАХ ТУХАЙ

Геодези, зураг зүйн тухай хуулийн 5.2.1-д заасныг үндэслэн Монгол Улсын Засгийн газраас ТОГТООХ нь:

1. Монгол Улсын нутаг дэвсгэрийн хэмжээнд хийгдэж байгаа геодезийн хэмжилт, зураглалын ажилд олон улсын геодезийн солбицлын ITRF2020 тогтолцоо, өндрийн сүлжээнд Балтийн тэнгисийн тогтолцоог, газрын зураглалд дэлхийн хөндлөн меркаторын "UTM" тусгагийг тус тус хэрэглэж байхаар тогтсугай.
2. Геодезийн солбицлын ITRF2020 тогтолцоонд шилжсэнтэй холбогдуулан хэрэгжүүлэх арга хэмжээний төлөвлөгөө баталж, үе шаттайгаар зохион байгуулан ажиллахыг Барилга, хот байгуулалтын сайд Б.Мөнхбаатар, Газар зохион байгуулалт, геодези, зураг зүйн газар (А.Энхманлай)-т үүрэг болгосугай.
3. Геодезийн солбицлын ITRF2020 тогтолцоонд шилжсэнтэй холбогдуулан хэрэгжүүлэх төсөл, арга хэмжээнд шаардагдах зардлыг 2023-2025 оны төсвийн хүрээний мэдэгдэл, төсвийн төсөөлөл болон жил бүрийн улсын төсвийн төсөлд тусгаж байхыг Барилга, хот байгуулалтын сайд Б.Мөнхбаатар, Сангийн сайд Б.Жавхлан нарт тус тус даалгасугай.
4. Энэ тогтоол гарсантай холбогдуулан "Геодезийн солбицол, өндөр тусгагийн нэгдсэн тогтолцоог батлах тухай" Засгийн газрын 2009 оны 1 дүгээр сарын 28-ны өдрийн 25 дугаар тогтоолыг хүчингүй болсонд тооцсугай.

Монгол Улсын Ерөнхий сайд Л.ОЮУН-ЭРДЭНЭ

Барилга, хот байгуулалтын сайд Б.МӨНХБААТАР

Зураг 2.Одоо хүчин төгөлдөр мөрдөж буйЗасгийн газрын тогтоол “Монгол Улсын геодезийн солбицол, өндөр, тусгагийн нэгдсэн тогтолцоог шинэчлэн батлах тухай”